

HAKRU'UK BA KONSTITUISAUN NO LEI SEI HAMETIN ESTADU

Lospalos, 11 Outubru 2019

Prezidente Repúblika, Francisco Guterres Lú Olo iha diálogu ho autoridade lokál no comunidade iha munisípiu Lautem ohin, iha jináziu, hateten katak hakru'uk ba Konstituisaun no lei sira ne'ebé vigora iha iha Timor-Leste sei hametin Estadu.

Timor-Leste presiza hametin liután estadu direitu no demokrátiku hodi hakru'uk ba Konstituisaun no lei sira ne'ebé vigora no tuir vontade povu nian, la'ós ema ida nian. Prezidente Repúblika hateten katak bainhira ema hotu hakru'uk ba Konstituisaun no lei sira Estadu bele sai metin no iha kbiit liután.

Órgaun estadu iha ninian knaar ketak-ketak maibé iha interdependénsia ba malu. Órgaun estadu ida la halo órgaun estadu sira seluk. Desizaun sira ne'ebé Prezidente Repúblika foti la'ós nu'udar opozisaun ida, maibé Konstituisaun mak haruka.

Prezidente Repúblika veta Dekretu sira husi VII Governu Konstituisional tanba konteúdu husi Dekretu sira la fó benefísiu ba povu. Nune'e mós Prezidente Repúblika veto Orsamentu Jerál Estadu 2018 tanba la fó prioridade ba povu nia moris maibé aloka barak liu ba konsumu ninian.

Prezidente Repúblika veta Lei Atividade Petrolíferu no Lei Fundu Petrolíferu tanba Tribunal Rekursu deklara inkonstitusionalidade, tanba ne'e husu fila fali ba Parlamentu Nasionál atu halo reformulasaun. Ne'e signifika órgaun estadu sira iha interdependénsia atu hadi'ak liután.

“Lei ne'ebé deklara inkonstitusionál ne'e labele sai fali Konstituisional. Estadu tenke hakru'uk ba nia Lei sira”, Prezidente Repúblika hateten. Relasiona ho soberania nasaun ninian, Prezidente Repúblika promulga Akordu Fronteira Marítima.

Relasiona ho preokupasaun ho membru VIII Governu ne'ebé seidak hetan posse, Prezidente Repúblika hateten: “Prezidente Repúblika la julga ema nia salan. Tribunal mak julga. Prezidente Repúblika husu atu pondera.”

Iha vizita Prezidente Repúblika iha munisípiu Lautem nu'udar parte ida husi Programa Prezidénsia Aberta ho objetivu atu rona hanoin sira husi baze hodi koordena serbisu entre órgaun estadu sira atu hetan solusaun ba problema sira. Prezidente Repúblika hateten katak mai hato'o hanoin sira kona-ba dezvoltamentu estadu no rona hanoin sira husi kraik, la'ós atu lori problema mai munisípiu, maibé lori problema husi baze atu hetan solusaun husi órgaun estadu.

MÍDIA PR